



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE
DREJTORIA E PËRGJITHSHME PËR MBROJTJEN E TË DHËNAVE PERSONALE
DREJTORIA E ANKESAVE DHE HARMONIZIMIT

Nr. 2212/1 prot.

Tiranë, më 11.09.2025

Lënda: Dhënie mendimi mbi *“Marrëveshjen ndërmjet Këshillit të Ministrave të Republikës së Shqipërisë dhe Kabinetit të Ministrave të Ukrainës mbi ripranimin e personave me qëndrim të paautorizuar”*

MINISTRISË SË BRENDSHME

Tiranë

Zyra e Komisionerit për të Drejtën e Informimit dhe Mbrojtjen e të Dhënave Personale (në vijim, *“Zyra e Komisionerit”*) ka administruar shkresën tuaj nr. 4408/2 prot., datë 03.09.2025, protokolluar me tonën me nr. 2212 prot., datë 08.09.2025, me anë të së cilës dërgoni për mendim projekt marrëveshjen ndërmjet Këshillit të Ministrave të Republikës së Shqipërisë dhe Kabinetit të Ministrave të Ukrainës, mbi ripranimin e personave me qëndrim të paautorizuar (në vijim, *“projekt marrëveshja”*), relacionin shoqërues, si dhe protokollin zbatues të saj.

Nga shqyrtimi i materialeve të dërguara, vërejmë se, parashikohet nënshkrimi i një marrëveshjeje ndërkombëtare ndërmjet shteteve palë, në kuadër të bashkëpunimit dhe forcimit të partneritetit në luftën kundër emigracionit të paligjshëm.

Në këtë kuadër, me qëllim zbatimin e projekt marrëveshjes dhe protokollit zbatues të saj, shtetet palë do të shkëmbejnë ndër të tjera, informacion, i cili përmban të dhëna personale, referuar ligjit nr. 124/2024 *“Për mbrojtjen e të dhënave personale”* (në vijim, *“Ligji”*).

Për rrjedhojë, Zyra e Komisionerit sugjeron të merren në konsideratë këto ndryshime dhe shtesa në tekstin e projekt marrëveshjes, në mënyrë që përmbajtja e saj të jetë konform Ligjit.

Në nenin 16 të projekt marrëveshjes, sugjerojmë që, paragrafi hyrës, të riformulohet me këtë përmbajtje:

“Komunikimi i të dhënave personale, do të realizohet duke përdorur mjete të sigurta komunikimi dhe vetëm nëse një komunikim i tillë është i nevojshëm për zbatimin e kësaj marrëveshjeje nga autoritetet kompetente të shteteve palë. Përpunimi dhe trajtimi i të dhënave

personale në një rast të veçantë, do të realizohet në përputhje me legjislacionin e brendshëm për mbrojtjen e të dhënave personale të shteteve palë të kësaj marrëveshje”.

Në vijim, duke qenë se Republika e Shqipërisë ka miratuar kuadrin ligjor të përafruar me Rregulloren e Përgjithshme Evropiane për Mbrojtjen e të Dhënave Personale 2016/679 dhe Direktivën e Policisë 2016/680, në mënyrë që të unifikohet terminologjia e përdorur në përputhje me legjislacionin në fuqi të mbrojtjes së të dhënave personale, si dhe në mbështetje të parashikimeve të pikës 3, të nenit 6 të Ligjit, sugjerojmë që, **germa c), e nenit 16 të projekt marrëveshjes**, të riformulohet me përmbajtje, si vijon:

“(c) të dhënat personale duhet të jenë të përshtatshme dhe të kufizuara në masën që është e nevojshme për realizimin e qëllimit për të cilin janë mbledhur dhe përpunuar, në veçanti, të dhënat personale të komunikuar mund të lidhen vetëm me sa më poshtë...”.

Lidhur me arsyetimin sa më sipër, si dhe bazuar në pikat 2 dhe 5, të nenit 6 të Ligjit, sugjerojmë që, **germa e), e nenit 16 të projekt marrëveshjes**, të saktësohet me përmbajtje, si vijon:

“Të dhënat personale mbahen në një formë që lejon identifikimin e subjekteve të të dhënave për një periudhë jo më të gjatë se sa është e nevojshme për qëllimin për të cilin ato përpunohen”.

Gjithashtu, Zyra e Komisionerit vlerëson se, **germa f), e nenit 16 të projekt marrëveshjes**, krijon paqartësi. Për këtë arsye, ju sjellim në vëmendje se, bazuar në parashikimet e legjislacionit shqiptar në fuqi për mbrojtjen e të dhënave personale, konkretisht në pikën 4, të nenit 6 të Ligjit, parashikohet se, kur të dhënat personale rezultojnë të pasakta ose të paplota, duhet të ndërmerren të gjithë hapat e nevojshëm për fshirjen e korrigjimin e menjëhershëm të këtyre të dhënave.

Për këtë qëllim, sugjerojmë që, **germa f), e nenit 16 të projekt marrëveshjes**, të riformulohet, në mënyrë të qartë, të kuptueshme dhe konform Ligjit, me përmbajtje, si vijon:

“Palët Kontraktuese, angazhohen të marrin çdo masë të nevojshme për të siguruar që përpunimi i të dhënave personale të kryhet në përputhje me legjislacionin specifik për mbrojtjen e të dhënave personale. Në rast se të dhënat personale rezultojnë të pasakta ose të paplota, në raport me qëllimin e përpunimit, secila palë merr masa për korrigjimin, fshirjen ose bllokimin e tyre dhe njofton menjëherë palën tjetër për çdo ndryshim të tillë, në funksion të garantimit të transparencës dhe respektimit të kësaj marrëveshjeje”.

Njëkohësisht, sugjerojmë që, **në nenin 16 të projekt marrëveshjes**, të parashikohet një pikë shtesë, me këtë përmbajtje:

“(iii) Palët Kontraktuese, në çdo rast, duhet të zbatojnë masat e duhura teknike dhe organizative për mbrojtjen e të dhënave personale, duke garantuar një nivel sigurie të

përshtatshëm ndaj rrezikut, sipas parashikimeve të legjislacionit specifik për mbrojtjen e të dhënave personale të shteteve palë të kësaj marrëveshje”.

Në përfundim, me reflektimin e propozimeve të mësipërme, Zyra e Komisionerit, e vlerëson projekt marrëveshjen dhe protokollin zbatues të saj, të hartuar në përputhje me legjislacionin për mbrojtjen e të dhënave personale.

Duke ju falënderuar për bashkëpunimin,

KOMISIONERI

Besnik Dervishi